

考工典第一百六十三卷

符節部彙考一

周

周制諸節置掌節掌守之辨其用以達於天下 按周禮地官大司徒之職若國有大故則致萬民

於王門令無節者不行於天下

訂義

鄭康成曰大故謂王崩及寇兵節六節有節乃得行防姦私也

鄉大夫之職國有大故則令民各守其閭以待政令以旌節輔令則達之 鄭鑿曰令出於口或得

以僞爲旌節則有合符之驗大司徒所謂令無節者不行於天下則使天下皆不得通鄉大夫所

不達者特鄉閭之間而已

司救凡歲時有天患民病則以節巡國中及郊野而以王命施惠 史氏曰天患菑眚民病札瘥也

以旌節表之使民知施惠出於王命也

司關凡所達貨賄者則以節傳出之 鄭康成曰商或取貨於民間無璽節者至關關爲之璽節及

傳出之其有璽節亦爲之傳傳如今移過所文書 王昭禹曰節以驗其物傳以書其數

有外內之送令則以節傳出內之 賈氏曰外之送令謂從諸侯之國畿外而入者則關人以節及傳內之至王內之送令者謂有王命從王國而出則亦以節傳出之送至畿上

掌節上士二人中士四人府二人史四人胥二人徒二十人掌守邦節而辨其用以輔王命 黃氏曰掌節在關取予便也節皆邦節有守節有行節玉節邦國守之角節都鄙守之是謂守節使節及門關道路之節皆行節也必自掌節出鄭言關市道路之官皆得爲節如此則雜主掌節何以設專職哉

守邦國者用玉節守都鄙者用角節 鄭康成曰玉節之制如王爲之以命數爲大小角用犀角其制未聞 易氏曰玉則美在其中而暢達於外諸侯之象角則致力於內而捍禦於外公卿大夫之象守則守節之義

凡邦國之使節山國用虎節土國用人節澤國用龍節皆金也以英蕩輔之 鄭鍔曰節皆用金取其寒暑燥濕不能變也使節亦欲不更所守故有取於金焉輔節必以英蕩所以護其外蕩竹也所謂瑤琨篠簜是也以蕩爲函畫爲文彩使其英華外著內有不變之剛外有可觀之文尊

王命而重使華也 易氏曰金以爲之鑄象有堅而不變之義蕩而加以英飾有儀文相接之禮
門關用符節貨賄用璽節道路用旌節皆有期以反節 鄭康成曰門關司門司關貨賄者主通貨
賄之官謂司市也道路者主治五涂之官謂鄉遂大夫也凡民遠出至於邦國邦國之民若來入
由門者司門爲之節入由關者司關爲之節其商則司市爲之節其以徵令及家徙則鄉遂大夫
爲之節唯時事而行不出關不用節也變司市言貨賄者璽節主以通貨賄非必由市或資於民
家焉變鄉遂言道路者容公邑及小都大都之吏皆主治五涂亦有民也符節者如今宮中諸官
詔符璽節者今印章旌節今使者所持節也 王氏曰門關則以符合之貨賄則以璽驗之道路
則以旌表之 黃氏曰節皆自掌節出符節付之門關之官璽節專之司關旌節付之道路之官
薛氏曰龍節虎節人節以金爲之輔之以英蕩至於符璽旌三節不言輔者以下文有以傳輔之
言凡則六節皆輔之以傳矣但以金爲者既輔之以英蕩又輔之以傳以竹爲者不過以傳輔之
春秋之時所爲龍節者輔以玉而不輔以英蕩昭二十九年公在鄆使公衍獻龍輔於齊侯說者
以爲龍輔玉者名所以取之輔龍節者矣

凡通達於天下者必有節以傳輔之無節者有幾則不達 鄭康成曰鬪土納之

秋官大行人十有一歲達瑞節 王昭禹曰瑞六瑞也節六節也達瑞節所以達四方而交之

小行人達天下之六節 鄭康成曰此謂邦國之節也達之者使四方亦皆齋法式以齊等之 鄭

鏐曰掌節言八節此言六節何也蓋八節有玉有角有虎有龍有人有旌有符有管此言虎節人節龍節皆用金則與掌節之文同言旌節言符節言璽節不言用竹則與掌節之文異蓋彼言所守以爲用則制度之所自出此則主於達之天下使無不通而已

山國用虎節土國用人節澤國用龍節皆以金爲之道路用旌節門關用符節都鄙用管節皆以竹爲之 項氏曰達節則齋六節之法往四方齊等之使皆有定式可以通達 鄭康成曰諸侯使臣

行覲聘則以金節授之以爲行道之信虎人龍者自其國象 王氏詳說曰天子使者聘於諸侯

諸侯使者聘於天子其爲節則一而已此虎節龍節人節之所以不同 鄭康成曰凡邦國之民

達出至他邦他邦之民來入由國門者門人爲之節由關者關人爲之節其以徵令及家徙鄉遂

大夫及采地吏爲之節皆使人執節將之以達之亦有期以反節 薛氏曰析木爲符全木爲管

賈氏曰掌節云貨賄用璽節門關用符節此無璽節司關言掌國貨之節以聯門市門節既相聯則同用符節可知矣 鄭鍔曰凡此六節者有國者君道欲其守而不變故用金道路門關都鄙皆臣道欲其有自然之節故用竹達之者欲通天下而無不用也

行夫掌邦國傳遽之小事媿惡而無禮者凡其使也必以旌節雖道有難而不時必達 鄭康成曰傳遽者今時乘傳騎驛而使者也 鄭鍔曰既有大小行人又有行夫者蓋大小行人備禮儀而使使之大者也行夫不用擯介疾傳遽而達其小事使之小者也大事有媿惡者大小行人以擯介而使若夫小車之媿惡者謂福慶禍災之小者也行人乘傳而往欲急遽以視其事惟其不用相禮之人故必執旌節爲信使之大者有使有副不患其不達若行夫則無介無介則慮其有患難而命不達故言雖道路有難而不時必達謂雖不能及所約之時要之必期於達也

環人掌送逆邦國之通賓客以路節達諸四方 鄭康成曰路節旌節也 王昭禹曰無節者有幾則不達故以路節達諸四方 鄭鍔曰謂之旌節則指其物也謂之路節則指其行於道也其實

一耳

漢

文帝二年九月初與郡守爲銅虎符竹使符

按漢書文帝本紀云云

注

應劭曰銅虎符第一至

第五國家當發兵遣使者至郡合符符合乃聽受之竹使符皆以竹箭五枚長五寸鐫刻篆書第一至第五張晏曰符以代古之圭璋從簡易也師古曰與郡守爲符者謂各分其半右留京師左以與之

十二年春三月除關無用傳

按漢書文帝本紀云云

張晏曰傳信也若今過所也如淳曰兩行

書繒帛分持其一出入關合之乃得過謂之傳也李奇曰傳檠也師古曰張說是也古者或用檠或用繒帛檠者刻木爲合符也

景帝四年春復置諸關用傳出入

按漢書景帝本紀云云

應劭曰文帝十二年除關無用傳至

此復用傳以七國新反備非常

宣帝本始四年詔民以穀入關者毋用傳

按漢書宣帝本紀本始四年春正月詔曰今歲不登民

以車船載穀入關者得毋用傳

師古曰傳傳符也欲穀之多故不問其出入也

後漢

後漢符節置令一人郎中四人主之 按後漢書百官志符節令一人六百石本注曰爲符節臺率主符節事凡遣使掌授節尙符璽郎中四人本注曰舊二人在中主璽及虎符竹符之半者符節令史二百石本注曰掌書 注漢官曰當得明法律郎周禮掌節有虎節龍節皆金也干寶注曰漢之銅虎符則其制也周禮又曰以英蕩輔之干寶曰英刻書也蕩竹箭也刻而書其所使之事以助三節之信則漢之竹使符者亦取則於故事也魏氏春秋曰中平六年始復節上赤葆

隋

文帝開皇七年頒青龍等符於總管刺史 按隋書文帝本紀開皇七年四月癸亥頒青龍符於東方總管刺史西方以騶虞南方以朱雀北方以元武

開皇九年夏閏四月丁丑頒木魚符於總管刺史雌一雄一 按隋書文帝本紀云云

開皇十年冬十月甲子頒木魚符於京師官五品以上 按隋書文帝本紀云云

開皇十五年五月丁亥制京官五品以上佩銅魚符 按隋書文帝本紀云云

唐

高祖武德元年定符節之制 按唐書高祖本紀武德元年九月癸丑改銀兔符爲銅魚符 按車服志初高祖入長安罷隋竹使符班銀兔符後改爲銅魚符以起軍旅易守長京都留守折衝府捉兵鎮守之所及左右金吾宮苑總監牧監皆給之畿內則左三右一畿外則左五右一左者進內右者在外用始第一周而復始宮殿門城門給交魚符廂右廂給開門符閉門符亦左符進內右符監門掌之蕃國亦給之雄雌各十二銘以國名雄者進內雌者付其國朝貢使各齎其月魚而至于不合者劾奏傳信符者以給郵驛通制命皇太子監國給雙龍符左右皆十兩京北都留守給麟符左二十右十九東方諸州給青龍符南方諸州朱雀符西方諸州鸞虞符北方諸州元武符皆左四右三左者進內右者付外行軍所亦給之隨身魚符者以明貴賤應召命左二右一左者進內右者隨身皇太子以玉契召勘合乃赴親王以金庶官以銅皆題其位姓名官有貳者加左右皆盛以魚袋三品以上飾以金五品以上飾以銀刻姓名者去官納之不刻者傳佩相付有傳符銅魚符者給封符印發驛封符及封魚函用之有銅魚而無傳符者給封函還符封函用之天子巡幸則京

師東都留守給留守印諸司從行者給行從印木契符者以重鎮守慎出納畿內左右皆三畿外左右皆五皇帝巡幸太子監國有軍旅之事則用之王公征討皆給焉左右各十九太極殿前刻漏所亦以左契給之右以授承天門監門晝夜勘合然後鳴鼓元武門苑內諸門有喚人木契左以進內右以授監門有勅召者用之魚契所降皆有勅書尙書省符與左同乃用大將出賜旌以顯賞賜節以專殺旌以絳帛五丈粉畫虎有銅龍一首纏緋旛紫縑爲袋油囊爲表節懸畫木盤三相去數寸隅垂赤麻餘與旌同

遼

遼制符契發兵用金魚國有重事用銀牌閤門喚仗用木契行幸用木箭 按遼史儀衛志自大賀氏八部用兵則合契而動不過刻木爲牌合太祖受命易以金魚 金魚符七枚黃金鑄長六寸各有字號每魚左右判合之有事以左半先授守將使者執右半大小長短字號合同然後發兵事訖歸於內府 銀牌二百面長尺刻以國字文曰宜速又曰勅走馬牌國有重事皇帝以牌親授使者手劄給驛馬若干驛馬闕取它馬代法晝夜馳七百里其次五百里所至如天子親臨須索更

易無敢違者使回皇帝親受之手封牌印郎君收掌

木契正面爲陽背面爲陰閣門喚仗則用

之朝賀之禮宣徽使請陽面木契下殿至於殿門以契授西上閣門使云授契行勘勘契官聲喏跪受契舉手勘契同俛興鞠躬奏內外勘契同閣門使云准敕勘契行勘勘契官執陰面木契聲喏平身立少退近後引聲云軍將門仗官齊聲喏勘契官云內出喚仗木契一隻准敕付左右金吾仗行勘勘契官云合不合門仗官云合凡再勘契官云同不同門仗官云同亦再勘契官近前鞠躬奏勘官左金吾引駕仗勾畫都知某官某對御勘同平身少退近後右手舉契云其契謹付閣門使進入閣門使引聲喏門仗官下聲喏勘契官跪以契授閣門使上殿納契宣徽使受契閣門使下殿奉敕喚仗 木箭內箭爲雄外箭爲雌皇帝行幸則用之還宮勘箭官執雌箭東上閣門使執雄箭如勘契之儀詳具禮儀志

宋

宋因唐制賜節度使以旌節 按宋史輿服志旌節唐天寶中置節度使受命日賜之得以專制軍事行卽建節府樹六纛宋凡命節度使有司給門旗二龍虎各一旌一節一麾槍二豹尾二旗以紅

繪九幅上設耀篋鐵鑲髹杠緋纛旌用塗金銅螭頭髹杠綢以紅繒畫白虎頂設髹木盤周用塗金飾節亦用髹杠飾以金塗銅葉上設髹圓盤三層以紅綠裝釘爲旒並綢以紫綾複囊又加碧油絹袋磨槍設髹木盤綢以紫繒複囊又加碧油絹袋豹尾製以赤黃布畫豹文並髹杠神宗熙寧五年詔新建節并移鎮並降敕太常寺排此旌節下左右金吾街仗司駢驥院給執擎人員鞍馬中興因之

太宗太平興國三年六月給乘驛銀牌 按宋史太宗本紀云 按輿服志符券唐有銀牌發驛遣使則門下省給之其制闊二寸半長五寸面刻隸字曰敕走馬銀牌凡五字首爲竅貫以韋帶其後罷之宋初令樞密院給券謂之頭子太宗太平興國三年李飛雄詐乘驛謀亂伏誅詔罷樞密院券乘驛者復制銀牌闊二寸半長六寸易以八分書上鈹二飛鳳下鈹二麒麟兩邊年月貫以紅絲

端拱 年給乘驛以樞密院券 按宋史太宗本紀不載 按輿服志太平興國三年詔乘驛者復制銀牌端拱中以使臣護邊兵多遺失又罷銀牌復給樞密院券

真宗咸平六年給軍中傳信牌 按宋史真宗本紀不載 按兵志真宗咸平六年十月給軍中傳信牌其制漆木爲牌長六寸廣三寸腹背刻字而中分之置鑿柄令可合又穿二竅容筆墨上施紙札每臨陣則分而持之或傳令則署其言而繫軍吏之頸至彼合契乃書復命因冀州團練使石普之請也

仁宗康定元年詔製軍中傳信牌及兵符 按宋史仁宗本紀不載 按輿服志仁宗康定元年五月翰林學士承旨丁度翰林學士王堯臣知制誥葉清臣等請製軍中傳信牌及兵符事詔令兩制與端明殿學士李淑詳定奏聞軍中符信竊要杜絕奸詐深合機宜今請下有司造銅兵符給諸路總管主將每發兵三百人或全指揮以上卽用又別造傳信朱漆木牌給應軍中往來之處每傳達號令關報會合及發兵三百人以下卽用又檢到符彥卿軍律有字驗亦乞令於移牒傳信牌上兩處叅驗使用一銅兵符漢制銅鑄上刻虎形今聞皇城司見有木魚契乞令省司用木契形狀精巧鑄造陝西五路每路依漢制各給一至二十計二十面更換給用仍以公牒爲照驗二傳信木牌先朝舊制合用堅木朱漆爲之長六寸闊三寸腹背刻字而中分之字云某路傳信牌却置池槽牙縫

相合又鑿二竅置筆墨上帖紙書所傳達事用印印號上以皮繫往來軍吏之項臨陣傳言應有取
索並以此牌爲言寫其上如已曉會施行訖復書牌上遣迴合乞下有司造牌每路各給一面爲樣
餘令本司依此製造分給諸處更換使用城砦分屯軍馬事須往來關會之處亦如數給與三字驗
凡軍行計會不免文牒或主司遺失懼罪單使被擒軍中所謀自然洩露故每分屯軍馬之時與主
將密定字號各掌一通不令左右人知其義理但於尋常公狀文移內以此字私爲契約有所施行
依此叅驗不得字有重疊及用兇惡嫌疑之語每用文牒之上別行寫此字驗訖印其上發往如所
請報到許卽依號却寫印遣回如不許卽空之此唯主將自知他人皆不得測符彥卿原用四十條
以四十字爲號今檢得只有三十七條內亦有不急之事今減作二十八字所貴軍中戎旅之人事
簡易記詔並從之 按文獻通考康定初製銅符上篆文曰某處發兵符下鑄虎豹爲飾而中分
之右五符留京師左符付總管鈐轄州軍事官高者掌之

神宗熙寧五年詔作諸銅符給京城門 按宋史神宗本紀熙寧五年六月丙寅作京城門銅魚符
按輿服志神宗熙寧五年詔西作坊鑄造諸銅符三十四副令三司給左契付諸門右契付大內鑰

赴庫今後諸門輪差人員依時轉銅契入赴庫勘同其鐵牌只請人自執在外仗止宿本庫依漏刻發鑰匙付外仗驗請人鐵牌給付候開門訖却執鐵牌納鑰匙請出銅契至晚却依上請納其開門朝牌六面亦隨銅契依舊發放時神宗以京城門禁不嚴素無符契命樞密院約舊制更造銅契中刻魚形以門名識之分左右給納以戒不虞而啟閉之法密於舊矣

高宗建炎三年改鑄虎符頒諸路

按宋史高宗本紀不載

按輿服志高宗建炎三年改鑄虎符

樞密院主之其制以銅爲之長六寸闊三寸刻篆而中分之以左契給諸路右契藏之門符制以緞裏紙版謂之號皇城司掌之勅入禁衛號黃綾八角三千道入殿門黃絹以方一千道入宮門黃絹以圓八千道入皇城門黃絹以長三千道紹興二年正月所定也後更宮門號以緋紅絹方皇城門以緋紅絹圓遂久用之後復盡以黃或方或圓各隨其制又有檄牌其制有金字牌青字牌紅字牌金字牌者日行四百里郵置之最速遞也凡赦書及軍機要切則用之由內侍省發遣焉 按文獻通考建炎三年五月改鑄虎符頒降令刑部遍下諸處見行虎符並不得施行
康定所鑄銅符仍繳納尙書省又製金字牌凡赦書及軍機要切則用之自內侍省遣焉日行五百里

紹興五年置節度使以下牙牌 按宋史高宗本紀紹興五年十一月庚午朔初置節度使以下金字牙符命都督府掌之 按玉海紹興五年十一月庚午朔初置節度使已下象牙牌其法自節

鉞正任至橫行遙郡第其官資書之於牌御書押字刻金填之仍合同製造一留禁中一降付都督府相臣主其事緩急臨敵果有建立奇勳之人量功勞先給賜以爲執守

孝宗乾道 年置雌黃青字牌 按宋史孝宗本紀不載 按輿服志乾道末樞密院置雌黃青字牌日行三百五十里軍期急速則用之

淳熙 年作黑漆紅字牌校其遲速以議賞罰 按宋史孝宗本紀不載 按輿服志淳熙末趙汝愚在樞密院乃作黑漆紅字牌奏委諸路提舉官催督歲校遲速最甚以議賞罰其後尙書省亦踵行之仍命逐州通判具出入界日時狀申省久之稽緩復如故紹熙末遂置擺鋪焉

金

金代符制有金銀木諸牌 按金史百官志符制初穆宗之前諸部長各刻信牌交互馳驛訊事擾人太祖獻議自非穆宗之命擅製牌號者置重法自是號令始一焉收國二年九月始製金牌後又

有銀牌木牌之制蓋金牌以授萬戶銀牌以授猛安木牌則謀克蒲葦所佩者也故國初與空名宣頭付軍帥以爲功賞遞牌卽國初之信牌也至皇統五年三月復更造銀牌其制皆不傳

大定二十九年正月章宗卽位製綠油紅字等符 按金史章宗本紀不載 按百官志符制大定二十九年製綠油紅字者尙書省文字省遞用之朱漆金字者勅遞用之並左右司掌之有合遞文字則牌送各部付馬鋪轉遞日行二百五十里如臺部別奉聖旨文字亦給如上制

章宗承安元年二月初造虎符發兵 按金史章宗本紀云云 按百官志虎符之制承安元年製以禮官言漢與郡國守相爲銅虎符唐以銅魚符起軍旅易守長等用之至是斟酌漢唐典故其符用虎並五左一右左者留御前以侍臣親密者掌之其右符隨路統軍司招討司長官主之闕則次官主之若發兵三百人以上及徵兵召易本司長貳官從尙書省奏請左第一符近侍局以囊封付主奏者尙書備錄聖旨與符以函同封用尙書省印記之皆專使帶牌馳送至彼主符者視其封以右符勘合然後奉行若一有參差者不敢承用主符者復用囊封貯左符上用職印具發兵狀與符以本司印封卽日還付使者送尙書省以進乃更其封以付內掌之人若復有事左符以次出周而